


Den Explorer benütten

Se hebbt al paar egen Datein anleggt, de Se in **Eigene Dateien** spiekert hebbt. Gaht Se nu in den Explorer un laat Se sik den Inhold vun den Ordner **Eigene Dateien** wiesen. Se schulln denn Ehr sülvst maakten Datein in't rechte Fenster sehn können.

Nu köönt Se ünnerscheidlich Informaschoonen över de Daten rutkriegen. De Datein köönt in't rechte Fenster nämli ünnerscheidlich präsentiert warrn.

Wenn Ehr rechtes Fenster so utsüht:










...denn is dat bi veel Datein swaar, den Überblick to behollen. Elk Datei mit'n groten Symbol! Dat geht nich. Dat ännert Se in Menü **Ansicht**.

Ansicht: Details



Ansicht | Details is de beste. Stellt Se dat so in, as dat Bild links dat wiest.

Mit düsse Ansicht kriggt Se in't rechte Fenster Infos to de Grött, Typ un Datum vun de Datein. De Saak is in praktische Spalten opdeelt.

Dateiname	Größe	Typ	Geändert am
 preise_juli.txt	4 KB	Datei TXT	13.07.01 17:56
 popup.html	40 KB	Microsoft HTML Documen...	05.09.01 00:19
 Odi et amo.doc	25 KB	Microsoft Word-Dokument	31.07.01 00:06
 nocopy.doc	24 KB	Microsoft Word-Dokument	13.08.01 19:26
 Napoleon über die Deutschen.doc	19 KB	Microsoft Word-Dokument	01.06.02 00:05
 Meena.doc	20 KB	Microsoft Word-Dokument	12.09.02 14:12
 M150M180M180 Fly.txt	1 KB	Datei TXT	13.07.01 17:59

Se köönt ok de annern Ansichten dörprobeern, avers de dööggt alle wenig. Ansicht **Details** is de profeschonellste vun all.

Wenn de Spalten mal nich breed noog sünd, dat Se den ganzen Inhold lesen köönt, denn maakt Se ehr breder! Wiest Se op de Grenz twüschen twee Spalten. De Muuswieser warrt dor to en Doppelpiel. Nu köönt Se mit daldrückte Muustast trecken!

Dateiname	Größe
abc	5 KB
markieren	194 KB

Doppelpiel = trecken!

An de Spaltengrenzen trecken

Wenn de Muuswieser to en Doppelpiel warrt, köönt Se an en Linie trecken. Dat gellt överall in Windows un in all Programme ünner Windows.

Sorteern

In't rechte Fenster köönt Se bi Ansicht **Details** nu de Daten ganz lichtfardig na Naam, Grött, Typ orr Datum sorteern:

- Op een Spaltenkopp klicken, t.B. **Größe** → Datein warrt na Grött sorteert.
- Nochmaal op den Spaltenkopp klicken → Datein warrt umgekehrt sorteert!

Dateiname	Größe	Typ	Geändert am
preise_juli.txt	4 KB	Datei TXT	13.07.01 17:56
popup.html	40 KB	Microsoft HTML Documen...	05.09.01 00:19
Odi et amo.doc	25 KB	Microsoft Word-Dokument	31.07.01 00:06
nocopy.doc	24 KB	Microsoft Word-Dokument	13.08.01 19:26
Napoleon über die Deutschen.doc	19 KB	Microsoft Word-Dokument	01.06.02 00:05
Meena.doc	20 KB	Microsoft Word-Dokument	12.09.02 14:12
M150M180M180 Fly.txt	1 KB	Datei TXT	13.07.01 17:59

De Spaltenköpp sünd de Felder, 'neem Dateiname, Größe usw. op steiht. Noch sünd de Datein nich na Grött sorteert, avers na den Klick ja.

So köönt Se de Datein vun A bet Z orr annersrüm sorteern, wenn Se mal en Datei mit en bestimmten Naam söökt; avers Se köönt ok de öllsten, niegsten, gröttsten, lüttsten Datein na baven tövern! Dat maakt villicht nich so veel her, wenn Se bloots wenig Datein in Ehrn Ordner **Eigene Dateien** liggen hebbt; avers wenn dat mehr warrt, is dat mennigmal heel nüttlich!


Ümnöömen (Umbenennen)

Alle mööglichen Objekte in Windows köönt Se ümnöömen. Ok Icons op'n Desktop – un natüürlich Datein un Ordner in'n Explorer. Dat geiht jümmers so:

- rechter Muusklick op dat Objekt
- in't Kontextmenü **Umbenennen** wählen
- De ole Naam is foorts markeert → niegen Naam einfach intippen!
- Mit **Enter (Return)** afsluten.

Wohrschu! Nöömt Se bloots sülvst maakte Datein un Ordner üm – un **nienich** wat ut den Ordner Windows!

Acht Se op de **Dateiendung**! Faken is de Explorer so instellt, dat se gor nich to sehn is. Wenn doch, mööt Se ehr stahn laten – nich löschen!



*Dat Kontextmenü kann lang ween; dat kümmt ok op an, wat op SeEhrn PC allens installeert is un welk Datei Se anklickt. **Umbenennen** steiht mehrst wied nerrn*

Programme starten ut den Explorer

De Datein, de Se in'n Explorer seht, köönt Se alle direkt apenmaken!

So geiht't:

- Programmsymbol orr Datei in't rechte Explorerfenster wiesen laten,
- doppelklicken.


→ geiht los!

As Datein je nu nich „nakelt“ apen maakt warrn köönt, maakt Windows glieks dat Programm mit apen, in dat de Datei to sehn is.

Söökst Se sik t.B. een vun Ehr egen Textdatein ut un doppelklickt Se ehr. De Datei warrt apen maakt – in dat Programm, dat dot tohöört! Programm un Datei gaht tosamen op.

Wenn Se en Bilddatei doppelklickt, geiht de Datei in dat tohöörn Bildprogramm op – nich etwa in'n Textprogramm. Windows weet, welk Aart Datei to welk Programm höört.

Woneemher weet dat denn dat?



Warrt de Datei doppelklickt, geiht se op – ok wenn dat Programm tovör nich apen weer!

Dateitypen

Datein sünd nich alle gliiek, de höört to Familien. Un de Familien ünnerscheid sik dör ehrn Nanaam – as bi de Minschen ok.

In de Ansicht **Details** finnt Se in't rechte Explorerfenster en Spalte **Typ**.

Dor steiht in, wat för'n Typ de Datein

hebbt – to wat för Familien se höört. Un to elk Familie höört en Programm. Textdatein warrt in't Textprogramm apenmaakt, Bilddatein in Bildprogramme. Mennigmaal steiht de Naam vun dat tohöörn Programm al in de Spalte **Typ** mit binn! So as hier in dat Bild „Microsoft Word Document“ usw. steiht.

Dateiname	Größe	Typ
win98_03_opgaven.doc	100 KB	Microsoft Word-Dokument
win98_03.doc	953 KB	Microsoft Word-Dokument
auffloesung2.bmp	577 KB	Bitmap
auffloesung1.bmp	577 KB	Bitmap
auffloesung1.gif	3 KB	GIF MGI PhotoSuite II Ima...
win98_01_solitaer.doc	157 KB	Microsoft Word-Dokument

Man ok an den Dateinaam köönt Se de Familie erkennen. Kiekt Se mal in de Spalte **Dateiname** in düt Bild hier. De Dateinaams gaht alle so:

`dateinaam.doc` orr `dateinaam.bmp` orr `dateinaam.gif`. Erst'n Naam, denn'n Punkt, un denn – de Nanaam, de de Familie angiff! De Nanaam is mehrst 3 Bookstaven lang. Bekannte Familien seht Se in de Tabell rechts.


Wenn een solk Datei doppelklickt warrt, weet Windows glieks, welk Programm dat nu nehmen mutt, de Datei apen to maken!

Den „Vörnaam“ vun en Datei köönt Se sülvten fastsetten (bi't Spiekern), de Nanaam steiht fast, denn he gifft de Aart vun Datei an. De Nanaam warrt automaatsch an den Vörnaam anhangt. De Nanaam warrt ok Datei-Endung orr Datei-Erweiterung nöömt.

Dateiendung	Dateityp
.doc	Word-Datein
.bmp, .jpg, .gif	ünnerscheidlich Familien vun Bilddatein
.txt	wat povere Textdatein
.exe	Programm-Datein (vun „executable“ = utföhrbaar)
.xls	Excel-Datein
.wav, .mid, .mp3	ünnerscheidlich Familien vun Sound-Datein
...un mennig mehr!	

Ik seh nix!

Sünd in SeEhnr Explorer in de Spalte **Dateiname** keen Endungen to sehn? Dat köönt Se licht ändern. Gaht Se na Menü **Ansicht | Ordneroptionen**, Registerkoort **Ansicht**, un kiekht Se na, wat bi de Opschoon **Dateinamenerweiterung bei bekannten Dateitypen ausblenden** de lütte Haken steiht. Wenn ja, is de schuld, dat de Datei-Endungen nicht to sehn weern. Mit'n Klick un denn **OK** ännert Se dat. Man Se bruukt dat nich – dat kümmt nich op an, dat Se de Datei-Endungen seht, man dat Se weet, dat dat jüm gifft.

**Ordner**


...sünd ok Datein! Man Ordner sünd de eenzige Aart Datei, de keen Nanaam hett. Dat kenntekent ehr. Ordner sünd einfach Datein, de dor to maakt sünd, annere Datein in sik to sammeln. Nix wieder. Ordner warrt vun ooldmoodsche Lü ok „Verzeichnisse“ nöömt.

Programme

...sünd Datein mit de Besünnerheit, dat dor nich bloots Daten, man ok Befehle in steken daat. Wenn dat Datei doppelklickt warrt (also apen maakt warrt), denn warrt de Befehle utführt – Fenster gaht op, dat Programm löppt. – Programmdatein hebbt de Endung **.exe**.

Navigeert Se t.B. in Ehn Explorer na de Systemsteuerung op den Desktop (bövelste Ebene)! Maakt Se de Systemsteuerung apen. Dor köönt Se de Muus in finnen. Wenn Se ehr

doppelklickt, geht dat bekannte Muusfenster op – en lütt Systemprogramm!



De Muus doppelklicken – un dat Dialogfenster geht apen

Se köönt op düsse Wies ok grote Anwenderprogramme starten – schoont dat lichter ut dat Startmenü geht. Navigeert Se t.B. na C:\Programme\Microsoft Office\Office un kiekht Se na, wat de Datei Winword.exe dor is. Dat is de Programmdatei vun Word. Un vele annere Programme gifft't hier! Se köönt ja na den Typ sorteern, Se weet noch, woans dat geht, nich? Kiekt Se sik de Typen dör, de dor sünd – man bloots bekieken, nix kaputtmaken!

Se weet nu: Wenn Se in't Startmenü gaht un en Programm starten wüllt, is dat eentlich en Datei, de dor apenmaakt warrt – en Datei, de Se ok in'n Explorer sehn köönt.

Tipp: Lästige Websieden-Ansicht?

Wenn Se'n lütten Billschirm hebbt, schullen Se dör de Ansicht **Als Webseite** nich Platz verschenken. De is ganz good för Biller, süss bruukt een ehr nich. Gaht Se na Menü **Ansicht** un kiekt Se, wat de Hoken vör **Als Webseite** to sehn is. Wenn ja, klickt Se op, denn is he weg.

Se hebbt nu Ehr Datenbestände grünlich bekeken un sik en Begriff vun de Dateitypen maakt. Nu gaht wi dorto över, sülven Ordner to maken un de Datein richtig to verwalten.